

四庫全書

集部

欽定四庫全書

集部

渭南文集卷四十一至四十二

詳校官庶吉士臣陳若霖

主事臣呂雲棟覆勘

總校官知縣臣繆琪

校對官典簿臣郭祚熾

騰錄監生臣劉能

欽定四庫全書

渭南文集卷四十一

皇太后靈駕發引祭文

宋 陸游 撰

風御上賓玉衣永閔生堯鈞弋尚懷帝武之祥從禹會  
稽遽奉宸園之上母慈罔極坤載無疆方同軌之畢來  
悵東朝之已遠然而艱難契闊歸慰聖主問安之誠壽  
考康寧躬享先后莫致之福陰功陽德上際下蟠歷遽

古而罕聞知聖心之無憾臣藩維有守愴慕徒深目斷  
柏城神馳霎御敢修饋奠之禮少致攀號之心

祭梁右相文

人之生世如雲之出於山川雲不自用用之者天降為  
甘澤散為豐年抑有時而弗用則輪囷磅礴或卷或舒  
以自適於野水之涯荒山之巔彼雲無心豈有用舍之  
異出處之偏哉公之在朝道大材全不為世變不為物  
遷顯相廟郊華袞金蟬太平之功溢於簡編謝病而歸

大節愈堅從容邇英抗議慨然曰我非堯舜之道不敢  
以陳於前孰謂萬鍾之祿不足顧留遂委之而僂乎抑  
公之學得聖所傳視生死為一區等華屋於荒阡乎又  
豈如雲之既散廓然太虛則前日用舍初不足以爲賢  
愚乎酒不盈觴肉不揜豆獨區區之詞寫其肺肝者公  
豈捐之乎

祭龔參政文

某官劔南公在廊廟書從驛來如奉色笑哀窮悼屈忘

其不肖歲戊戌春某辱號召歸未及都公歿荒徼山川  
阻脩萬里孤旄官事有守不遑往弔寓哀一觴公乎來  
酌

祭魯國太夫人文

嗚呼昔先太師遜世懷寶播慶於家生我元老維少傅  
公秉德逢辰長養成就則繫夫人少傅在朝衮衣繡裳  
帝錫夫人御醴宸章少傅在藩豹尾玉節帝錫夫人兼  
金重帛食曰盛哉其榮則多夫人曰嘻其報伊何帝虛

元弼方屬少傅於時夫人以疾即路煌煌安輿少傅實  
從天祐德人華其初終某受恩門闡義均子姓晚偕婦  
息升堂修敬萬里羈宦忽承哀音東望永懷破裂寸心  
送車轡轡傾動鄉鄙隕涕羞奠形留神往

祭王侍御令人文

惟靈生自大家來嬪德門象服有燦娣媵如雲相我御  
史克勤藻頻諸子甚材頎然薦紳世所願懷孰如夫人  
惟是孤生實忝外姻萬里焉依如在鄉鄰遭此不淑慘

然酸辛尊鯽之微侑以斯文

祭祝永康文

嗟我與公萬里羈單人孰知之所恃者天庶幾白首相  
從鄉關追談梁益把酒笑歡云胡不淑一病莫還遺孤  
孑立未逮冠婚謂天可恃公宜百年玉裂竹折喟其永  
歎公守導江齧蘖飲泉凜凜色詞請謁莫干人或謗嘲  
公守益堅雖昔君子終此實難云持此歸何憾九泉公  
喪之東丹旄翩然我病莫興撫枕涕潛矢辭羞莫尚慰



營魂

祭劉樞密文

嗚呼公乎有文有武有仁有智立朝無助以直自遂聲  
氣不動而折萬里之衝從容一言而決盈廷之議蓋人  
所難公之所易仰天俯地一念不愧秋毫未安寢食忘  
味輕失富貴而重朋友之責自屈達尊而下白屋之士  
蓋人之所忽公之所畏昔歲癸未某始去國見公西省  
凜然正色顧雖不肖竊師公直流落得歸公與有力舟

過金陵公疾已亟命之不淑旋聞易簀祭不及時實負  
盛德尚想平生出涕橫臆

祭蔣中丞夫人文

維靈出由德閥克配儒先從容圖史之規肅敬蘋蘩之  
薦是生者哲來瑞明時大邦開賜沐之封列鼎極循陔  
之養奄聞不淑靡究遐齡窈窕有期川途云邈雖莫綴  
千車之盛顧敢稽一酌之恭仰冀靈魂俯歆誠意

祭趙提刑文

惟靈早以茂異起膺簡求逢時休明為國壽雋建牙淮  
服擁節王畿方期來朝遽以疾諗挂冠決去共高靜退  
之風易簣亟聞何勝殄瘁之感某早託通家之好晚逢  
攬轡之行揮塵軒昂恍如昨日拊棺摧痛莫喻孤懷敢  
陳一奠之恭少叙九京之訣

祭勤首座文

我之與公義則師友情骨肉也相從十年談道賦詩藝  
松菊也別雖數月使來自東書相續也比獨怪公書詞

諄諄若予屬也嗟哉已矣頽然野鶴尚在目也卵墮告  
成欲往不果身桎梏也上愧道義下負交情淚可掬也  
龍文之茗沈水之薰薦甘馥也懷舊之心有如丘山此  
一粟也

祭許辰州文

惟靈美操懿行達識英辭筆陣掃千人軍早擢太常之  
第胸中吞九雲夢耻裁光範之書抱沈英之痛者十年  
分共理之憂者兩郡人之不淑生也有涯旅館招魂一

朝今古孤舟反葬萬里風濤豈知故里之交遽作夜臺  
之別魂兮未遠鑒此哀誠嗚呼哀哉

祭韓无咎尚書文

兄之初載甚躋而躋逢亂客吳萬里孤騫文方日衰蕩  
為狂瀾組織纖弱各自謂賢士睨莫救兄勇而前陋巷  
一室日旰未饘誦書鼓琴志操益堅落筆天成不事雕  
鐫如先秦書氣充力全壯年相從顧憫我孱曰是有志  
許以周旋我自蜀歸兄典三銓邂逅都門挈手歡然兄

牧東陽我走閩山曠不相值今五六年我病早衰顧未及泉兄之壽康一朝先顛餉酒踵門乃酌柩前嗟嗟造物孰尸此權豈其好惡亦與俗遷微官有守喪車莫攀尊鯽之奠叙訣終天

祭胡監丞文

惟公文學足以發身政事足以宜民人則不合何罪於神乃者起家往守宜春臨別慨然握手江津曾未逾月乃以訃聞舟載銘兆返其鄉枌臺省衮衮公獨逡巡室

家嘻嘻公獨悲辛我雖晚交甚知公真適苦肝腸莫弗  
及親尚想生平寓哀斯文

祭丘運使母夫人文

昔先大夫懷寶里閭沒世不耀乃以其孤屬之夫人道  
德是詔故河圖公文學政事望在廊廟榮養五鼎眉壽  
百年其德彌劬高識超然朱門畫戟視若蓬藿再入都  
城曾未溫席翩其歸旒方歲之惡公私交病冀寬賦調  
而河圖公遽以憂歸道路相弔我登門闡情均甥姪宜

送宅兆官守所廢矢辭傷悲薦此清醪

祭曾原伯大卿文

惟靈淵乎似道敏而好學韋編鐵硯雪窓螢几不足以  
言其勤冢書壁簡銅牆鬼炊不足以名其博文辭典與  
論議超卓不使直承明之庭猶當置之天祿之閣時方  
越拘攣以用人公奚彼之不若而乃老於惠文之冠弗  
預甘泉之橐痛結慈闈悲纏華萼凡閭巷之故交想話  
言之如昨聞訃相弔摧然涕落羞一醕以祖行冀九原



之可作

祭大姪文

汝實先少傳之長孫岳州使君之嫡子早列仕籍垂五  
十年夫婦二人更相為命嶺海萬里淪謝不還收骨於  
灰燼之中藏榱於松楸之次煩冤痛酷霑涕何言歿而  
有靈歆此薄醊

祭十郎文

自汝不幸早世將二十年乃克祔葬於先少師魯國夫

人塋兆之南岡距汝母令人墓尤邇汝而不泯豈不得  
所願哉感念疇昔悲痛何言

祭朱元晦侍講文

某有捐百身起九原之心有傾長河注東海之淚路脩  
齒耄神往形留公歿不亡尚其來饗

祭方伯謨文

予與伯謨別於武夷予五十有五齒髮未衰伯謨蓋方  
壯耳顧後日猶長未知別之悲也俯仰二十有一年卒

不相遇而伯謨遂捨我而何之乎予年垂八十如朝露  
之將晞與伯謨別尚復幾時生也相遇猶不可必死遊  
地下果可期乎予言之及茲涕不可止伯謨尚能有知  
也乎

祭張季長大卿文

於虜世之定交有如某與季長者乎一產岷下一家山  
陰邂逅南鄭異體同心有善相勉闕遺相箴公醉巴歌  
我病越吟大笑劇談坐客皆瘖公既造朝衆彥所欽我

南入蜀九折嶽岑公以憂歸我亦陸沈久乃相遇垂涕  
霑襟宿好未遠舊盟復尋駕言造公公已來臨我倡公  
和如鼓瑟琴送我東歸握手江潯欲行復尼頓足噫喑  
是實古道乃見於今公還為卿華路駸駸我方畏讒潛  
恐不深公去我召如商與參渺邈天涯一書萬金我自  
史闡進長書林迫老亟退突不暇黔亦嘗挽公力微弗  
任比乃聞公請投華簪旋又聞計天乎難謀玉樹永閔  
龍柏已森何時復聞正始遺音清酒絮中不及手斟英

魂如生豈忘來歆於庠哀哉

祭周益公文

某紹興庚辰始至行在見公於途欣然傾蓋得居連牆  
日接嘉話每一相從脫帽褫帶從容笑語輸寫肝肺鄰  
家借酒小圃鉏菜熒熒青燈瘦影相對西湖弔古並轡  
共載賦詩屬文頗極竒怪淡文如水久而不壞各謂知  
心絕出流輩別二十年公位鼎鼐我方西遊荷戈窮塞  
歸得臺卽旋又坐廢公亦策免久處於外見不可期使

我形瘵斯文日卑公則崧岱士昏於智公則蓍蔡公老  
不衰雷霆百代每得手書字細如芥癡兒騃女問及瑣  
碎孰為一病良醫莫差赴告鼎來震動海內犇赴不遑  
涕泗澎湃豈無尊鯽致此薄酌辭則匪工聊寄悲慨

尤延之尚書哀辭

帝藝祖之初造兮紀號建隆煥乎文章兮躡揖遜之遐  
蹤詔冊施於朝廷兮萬里雷風灑灑噩噩兮始掃五季  
之雕蟲閱世三傳兮車書大同黃麾繡仗兮駕言東封

繼七十二后於邃古兮勤崇垂鴻吾宋之文抗漢唐而  
出其上兮震耀無窮柳張穆尹歐王曾蘇名世而間出  
兮巍如華嵩雖宣和之蠱弊與建炎之軍戎文不少衰  
兮殷殷霑霑太平之象兮與六龍而俱東余自梁益歸  
吳兮悵故人之莫逢後生成市兮摘裂剽掠以為工遇  
尤公於都城兮文氣如虹落筆縱橫兮獨殿諸公晚乃  
契遇兮北扉南宮塗改雅頌兮蹈躡軻雄余久擯於世  
俗兮公顧一見而改容相期江湖兮斗粟共春別五歲

兮晦顯靡同書一再兮奄其告終於瘁哀哉孰抗衣而  
復公兮呼伯延甫於長空孰誦些以招公兮使之捨四  
方而歸徠乎郢中孰酌荒丘兮露草霜蓬孰闖虛堂兮  
寒燈夜蛩文辭益衰兮奇服尤茸天不憖遺兮黼黻火  
龍嗟局淺之一律兮彼寧辨夫瓦釜黃鐘話言莫聽兮  
孰知我衷患難方殷兮孰恤我躬君蒿不返兮吾黨孰  
宗死而有知兮惟公之從

沈子壽母趙夫人哀詞



嗚呼人孰無母母孰無子母以壽終子克終養亦可紓  
無窮之悲矣維吾子壽自初遭難晝夜號泣匪淚伊血  
羸乎莫支陞堂弔祭者不忍聞其聲得書赴告者不忍  
觀其辭子壽蓋曰不孝孤少罹閔凶父喪母嫠無壟可  
耕母子相依及遊太學母客京師冬兮母寒晝兮母飢  
飢無一囊之粟寒無一襲之衣不孝孤雖食於學官羹  
藟在前歎息而麾撫所讀書而與之誓曰編絕則輯字渝  
則補寧死於書傍不敢畏難苟止以負吾母之慈如是

十年幸賜第於太常歸而拜母相持以泣淚盡目萎母  
前子後告於先墓庶幾吾父聞之而寬其九泉之思也  
於辱此子壽之既言而其未言者蓋可推矣奉身以道  
義發身以詩書文章傳於不朽節行全而無虧士患無  
志不患無位士患無才不患無恃子壽之志所以事親  
者蓋其所以事君子壽之才顧猶屈而未施親則日遠時  
節奉祀如將見之一言一行足以顯揚吾親者苟有怠  
忽是以吾親為歿而亡知也子壽之令名與天壤同弊

則親實與焉誅刻十字置守萬家蓋不足進於斯也子  
壽之存於胸中而未言者予得陳之非獨慰吾子壽蓋  
以為天下孝子之詒哀哉

渭南文集卷四十一

欽定四庫全書

渭南文集卷四十二

宋 陸游 撰

天彭牡丹譜

花品序第一

牡丹在中州洛陽為第一在蜀天彭為第一天彭之花皆不詳其所自出土人云曩時永寧院有僧種花最盛俗謂之牡丹院春時賞花者多集於此其後花稍衰人

亦不復至崇寧中州民宋氏張氏蔡氏宣和中石子灘  
楊氏皆嘗買洛中新花以歸自是洛花散於人間花戶  
始盛皆以接花為業大家好事者皆竭其力以養花而  
天彭之花遂冠兩川今惟三井李氏劉村毋氏城中蘇  
氏城西李氏花特盛又有餘力治亭館以故最得名至  
花戶連畛相望莫得而姓氏也天彭三邑皆有花惟城  
西沙橋上下花尤超絕由沙橋至壩口崇寧之間亦多  
佳品自城東抵濛陽則絕少矣大抵花品近百種然著

者不過四十而紅花最多紫花黃花白花各不過數品  
碧花一二而已今自狀元紅至歐碧以類次第之所未  
詳者姑列其名於後以待好事者

狀元紅

祥雲

紹興春

燕脂樓

金腰樓

玉腰樓

雙頭紅

富貴紅

一尺紅

鹿胎紅

文公紅

政和春

醉西施

迎日紅

彩霞

疊羅

勝疊羅

瑞露蟬

乾花

大千葉

小千葉

右二十一品紅花

紫繡毬 乾道紫 潑墨紫 葛巾紫 福嚴紫

右五品紫花

禁苑黃 慶雲黃 青心黃 黃氣毬

右四品黃花

玉樓子 劉師哥 玉覆盃

右三品白花

歐碧



右碧花

轉枝紅 朝霞紅 灑金紅 瑞雲紅 壽陽紅

探春毬 米囊紅 福勝紅 油紅 青絲紅

紅鵝毛 粉鵝毛 石榴紅 洗粧紅 蹙金毬

間綠樓 銀絲樓 六對蟬 洛陽春 海芙蓉

膩玉紅 內人嬌 朝天紫 陳州紫 袁家紫

御衣紫 斬黃 玉抱肚 勝瓊 白玉盤

界金樓 樓子紅

右三十二品未詳

花釋名第二

洛花見紀於歐陽公者天彭往往有之此不載載其著  
於天彭者彭人謂花之多葉者京花單葉者川花近歲  
尤賤川花賣不復售花之舊栽曰祖花其新接頭有一春  
兩春者花少而富至三春則花稍多及成樹花雖益繁  
而花葉減矣狀元紅者重葉深紅花其色與鞞紅潛緋  
相類而天姿富貴彭人以冠花品多葉者謂之第一架

葉少而色稍淺者謂之第二架以其高出衆花之上故名狀元紅或曰舊制進士第一人即賜茜袍此花如其色故以名之祥雲者千葉淺紅花妖豔多態而花葉最多花戶王氏謂此花如朶雲狀故謂之祥雲紹興春者祥雲子花也色淡佇而花尤富大者徑尺紹興中始傳大抵花戶多種花子以觀其變不獨祥雲耳燕脂樓者深淺相間如燕脂染成重趺累萼狀如樓觀色淺者出於新繁勾氏色深者出於花戶宋氏又有一種色稍下

獨勾氏花為冠金腰樓玉腰樓皆粉紅花而起樓子黃  
白間之如金玉色與燕脂樓同類雙頭紅者並蒂駢萼  
色尤鮮明出於花戶宋氏始秘不傳有謝主簿者始得  
其種今花戶往往有之然養之得地則歲歲皆雙不爾  
則間年矣此花之絕異者也富貴紅者其花葉圓正而厚  
色若新染未乾者他花皆落獨此抱枝而槁亦花之異  
者一尺紅者深紅頗近紫色花面大幾尺故以一尺名  
之鹿胎紅者鶴頂紅子花色紅微帶黃上有白點如鹿

胎極化工之妙歐陽公花品有鹿胎花者乃紫花與此  
頗異文公紅者出於西京潞公園亦花之麗者其種獨  
蜀中遂以文公名之政和春者淺粉紅花有絲頭政和  
中始出醉西施者粉白花中間紅暈狀如酡顏迎日紅  
者與醉西施同類淺紅花中特出深紅花開最早而妖  
麗奪目故以迎日名之彩霞者其色光麗爛然如霞疊  
羅者中間瑣碎如疊羅紋勝疊羅者差大於疊羅此三  
品皆以形而名之瑞露蟬亦粉紅花中抽碧心如合蟬

狀乾花者粉紅花而分蟬旋轉其花亦富大千葉小千  
葉皆粉紅花之傑者大千葉無碎花小千葉則花萼瑣  
碎故以大小別之此二十一品皆紅花之著者也紫繡  
毬一名新紫花蓋魏紫之別名也其花葉圓正如繡毬  
狀亦有起樓者為天彭紫花之冠乾道紫色稍淡而暈  
紅出未十年潑墨紫者新紫花之子花也單葉深黑如  
墨歐公記有葉底紫近之葛巾紫花圓正而富麗如世  
人所戴葛巾狀福嚴紫亦重葉紫花其葉少於紫繡毬

莫詳所以得名按歐公所紀有玉版白出於福嚴院土  
人云此花亦自西京來謂之舊紫花豈亦出於福嚴耶  
禁苑黃蓋姚黃之別品也其花間淡高秀可亞姚黃慶  
雲黃花葉重複郁然輪囷以故得名青心黃者其花心  
正青一本花往往有兩品或正圓如毬或層起成樓子  
亦異矣黃氣毬者淡黃檀心花葉圓正向背相承敷腴  
可愛玉樓子者白花起樓高標逸韻自然是風塵外物  
劉師哥者白花帶微紅多至數百葉纖妍可愛莫知何

以得名玉覆盃者一名玉炊餅蓋圓頭白花也碧花止  
一品名曰歐碧其花淺碧而開最晚獨出歐氏故以姓  
著大抵洛中舊品獨以姚魏為冠天彭則紅花以狀元  
紅為第一紫花以紫繡毬為第一黃花以禁苑黃為第  
一白花以玉樓子為第一然花戶歲益培接新特間出  
將不特此而已好事者尚屢書之

風俗記第三

天彭號小西京以其俗好花有京洛之遺風大家至千



本花時自太守而下往往即花盛處張飲帟幙車馬歌  
吹相屬最盛於清明寒食時在寒食前者謂之火前花  
其間稍久火後花則易落最喜陰晴相半時謂之養花  
天栽接剔治各有其法謂之弄花其俗有弄花一年看  
花十日之語故大家例惜花可就觀不敢輕翦蓋翦花  
則次年花絕少惟花戶則多植花以侔利雙頭紅初出  
時一本花取直至三十千祥雲初出亦直七八千今尚  
兩千州家歲常以花餉諸臺及旁郡蠟蒂筠籃旁午於

道予客成都六年歲常得餉然率不能絕佳淳熙丁酉  
歲成都帥以善價私售於花戶得數百苞馳騎取之至  
成都露猶未晞其大徑尺夜宴西樓下燭焰與花相映  
發影搖酒中繁麗動人嗟乎天彭之花要不可望洛中  
而其盛已如此使異時復兩京王公將相築園第以相  
誇尚予幸得與觀焉其動蕩心目又宜何如也明年正  
月十日山陰陸某書

天申節致語

得吾道而上為皇方探真詮之妙有天下而尊歸父適  
當孝治之隆肆均湛露之恩用侈流虹之瑞恭惟皇帝  
陛下德高邃古澤被縣區神武應期三紀撫紹開之運  
希夷玩志兆民傾愛戴之誠爰輯上儀式彰華旦山呼  
萬歲驩已浹於神人花覆千官慶更同於中外臣獲預  
梨園之法部遙瞻鳳闕於丹霄敢采民謠恭陳口號

宮殿紅雲捧紫皇河清電繞擁休祥壺中常占青春在  
物外方知浩劫長畫立龍旗風不動曉開璫笈遠飄香

堯年豈特封人祝動地驩聲遍萬方

又

樞電効祥丕顯生商之旦需雲示惠肆均在鎬之恩喜  
溢鵷鸞光生俎豆伏惟皇帝陛下聖神廣運垂拱無為  
躬堯舜之性仁致成康之刑措克肖其德天惟申命用  
休非求於民人皆同心以戴號令雷風之鼓舞文章日  
月之昭明侈甲觀之昌期疏瑤池之廣宴山呼萬歲花  
覆千官激灑上樽味挹金莖之露悠揚法曲聲留玉宇

之雲臣等生值聖時身參樂府敢緣歸美之義賡載太平之詩

廣殿遙聞警蹕音觚稜曉色尚沈沈半空瑞靄爐香馥  
一點紅雲黼座深夷夏驪聲歸羽舞乾坤和氣入薰琴  
欲知聖德齊堯舜遡闕爭傾萬國心

又

有王者興應繞電流虹之瑞使聖人壽實敷天率土之  
心欣逢震夙之期恭致龐鴻之祝伏惟皇帝陛下聰明

稽古歷數在躬聖澤上際而下蟠睿化東漸而西被追  
景德祥符之治萬寓丕平御紫宸垂拱之朝四夷入貢  
爰錫需雲之宴用均湛露之恩臣等端遇清時遙瞻丹  
闕聽虞帝簫韶之奏同極驩情綴漢家樂府之詩敢陳  
薄伎

嘉會千齡豈易逢珮聲俱集未央宮九重鳳闕瞳矐日  
百尺龍旗掩萼風奇瑞屢書圖牒上太平長在詠歌中  
區區擊壤雖無取意與生民既醉同

徐稚山給事慶八十樂語

伏以就第而賜安車爰及嘗珍之歲為酒以介眉壽宜  
伸善頌之誠恭惟致政龍學給事東省近臣西清宿望  
體鍾和氣生元祐之盛時道合聖君贊隆興之初政抗  
議每先於諸老遺榮靡顧於萬鍾雖容疎傳之歸行見  
謝公之起至若簞金比訓庭玉生輝出將使指之榮入  
奉色難之養膺茲全福屬我耆英維降嶽之嘉辰當發  
春之令月廟堂舊弼紆華袞以臨觴臺閣名卿煥繡衣

而在席式歌且舞俾熾而昌上對台顏敢陳口號  
欲知主聖本臣忠傾盡嘉謨沃舜聰同載方如周呂尚  
安車不數漢申公日烘盎盎花光暖燭映鱗鱗酒浪紅  
白首同朝各强健莫辭爛醉答春風

致語

伏以碧油紅旆有嚴幕府之容瑤俎華觴用飾輿情之  
喜恭惟某官西清禁從東省名臣據古守經凜北斗泰  
山之望黜浮崇雅粲銘鍾篆鼎之辭行表縉紳言書簡



冊雖弗容然後見君子顧未起何以慰蒼生適茲謀帥  
之辰誰處耆英之右佩麟符而就鎮猶屈經綸穿豹尾  
以還朝佇聞趣召某官爰申宴樂式奉笑談士民踴躍  
而仰瞻將吏奔馳而即事諧金石鏗鏘之奏盛魚龍曼  
衍之觀上對台堦敢陳口號

曾立蛾眉禁省班至今風采照金鑾縱橫筆陣千人廢  
浩蕩辭源萬頃寬落紙煙雲紛態度照人冰玉峙高寒  
從容坐嘯香凝寢說與賓僚拭目觀

又

西顥司辰素商紀節消日初開於幕府肆筵式奉於皇  
華恭惟某官節槩清真風規簡亮過眼不再盡讀五車  
之書落筆可驚早冠萬人之勇文久傳於後學名疑覩  
於昔賢凜臺柏之生風煥使星之下燭繡衣持斧威聲  
方肅於列城豹尾屬車趣召行參於法從某官爰開燕  
豆欸奉談犀畫棟珠簾納九秋之爽氣金樽玉酒醉一  
道之歡聲仰對台堦敢陳口號

涼月參差白露漙漙請看賓主罄清歡麟符玉節交相映  
鳳竹鸞絲殊未闌百穀方登倉庾足七州無事里閭安  
樽前莫惜山頽玉四者能兼自古難

渭南文集卷四十二

欽定四庫全書

渭南文集卷四十三

宋 陸游 撰

入蜀記

乾道五年十二月六日得報差通判夔州方久病未堪  
遠役謀以夏初離鄉里

六年閏五月十八日晚行夜至法雲寺兄弟餞別五鼓  
始決去

十九日黎明至柯橋館見送客已時至錢清食亭中涼  
爽如秋與諸子及送客步過浮橋橋堅好非昔比亭  
亦華潔皆史丞相所建也申後至蕭縣憩夢驛驛在  
覺苑寺旁世傳寺乃江文通舊居也有大碑葉道卿  
文寺額及佛殿榜皆沈睿達所書有碑亦睿達書尤  
精古又有毗陵人戚舜臣所畫水蓋佛後座大壁也  
卒然見之覺濤瀾洶湧可駭前輩或謂之死水過矣  
縣丞權縣事紀旬尉曾槃來曾原伯逢招飲於其子

槃辭中二鼓歸原伯復來共坐驛門月如晝極涼四  
鼓解舟行至西興鎮

二十日黎明渡江江平無波少休仙林寺寺僧為開館  
設湯飲遂買小舟出北關登漕司所假舟於紅亭稅  
務之西夜無蚊

二十一日省三兄

二十二日至二十四日皆留兄家

二十五日晚葉夢錫侍郎衡招飲案間設礬山數盆望

之如雪

二十六日晚芮國器司業聘招飲同集仲高兄詹道子  
大著亢宗張叔潛編修淵坐中國器云頃在廣東作  
漕有提舉茶鹽石端義者性殘忍每捕官吏繫獄輒  
以石鹽木枷枷之蓋木之至堅重者每曰木名石鹽  
天生此為我用也其後石坐罪竟荷校云

二十七日

二十八日同仲高出閣門買小舟泛西湖至長橋寺予



不至臨安八年矣湖上園苑竹樹皆老蒼高柳造天  
僧寺益葺而舊交多已散去或貴不復相通為之絕  
歎

二十九日沈持要檢正樞招飲邂逅趙德莊少卿彥端  
晚出湧金門並湖繞城至舟中

三十日

六月一日早移舟出閘幾盡一日始能出三閘船舫櫂  
比熱甚午後小雨熱不解泊糴場前

二日禺中解舟鄉僕來言鄉中閔雨村落家家車水比連三年頗稔今春父老言占歲可憂不知終何如也過赤岸班荆館小休前亭班荆者北使宿頓及賜燕之地距臨安三十六里晚急雨頗涼宿臨平臨平者太師蔡京葬其父準於此以錢塘江為水會稽山為案山形如駱駝葬於駝之耳而築塏於駝之峯蓋葬師云駝負重則行遠也然東坡先生樂府固已云誰似臨平山上塏亭亭迎客西來送客行則臨平有塏

亦久矣當是蔡氏葬後增築或遷之耳京貴太子少保制云託祝聖而飾臨平之山是也夜半解舟

三日黎明至長河堰亦小市也魚鱗甚富午後至秀州崇德縣縣令右從政郎吳道夫丞右承直郎李植監秀州都稅務右從政郎章湜來舊聞戴子微云崇德有市人吳隱忽棄家寓旅邸終日默坐一室室中惟一卧榻客至共坐榻上或載酒過之亦不拒清談竟日隱初不學問至是間與人言易數皆造精微亦能

先知人吉凶壽夭見者莫能測也因見吳令問之云  
皆信然今徙居村落間矣是晚行十八里宿石門火  
雲如山明日之熱可知也

四日熱甚午後始稍有風晚泊本覺寺前寺故神霄宮  
也廢於兵火建炎後再修今猶甚草創寺西廡有蓮  
池十餘畝飛橋小亭頗華潔池中龜無數聞人聲皆  
集駢首仰視兒曹驚之不去亭中有小碑乃郭功甫  
元祐中所作醉翁操後自跋云見子瞻所作未工故

賦之亦可異也

五日早抵秀州見通判權郡事右通直郎朱自求員外

通判右承事郎直祕閣趙師夔方務德侍郎滋務德

留飯飯罷還舟小憩極熱謁樊自強主管樊自牧教

授廣抑

皆茂部子

聞人伯卿教授

阜民茂德刪定子

二樊居城外

居第頗壯茂實晚歲所築尚未成也隔水有小園竹

樹脩茂荷池渺瀰可喜池上有堂曰讀書堂遊寶華

尼寺拜宣公祠堂有碑缺壞磨滅之餘時時可讀蘇

州刺史于頔書大略言祕書監陸公齊望始作尼寺  
於此其後灞漣澧兄弟又新之後又有賢妹字意者  
陸氏嘗有女子為尼云然不言宣公所以有祠者

家譜

澧賴此證誤諱灞  
者則宣公之父也

老尼妙濟大師法淳及其弟子居

白留啜茶且言方新祠堂也移舟北門宣化亭晚復

過務德飯

六日右奉議郎新通判荆南呂援來援字彥能進士聞  
人綱來綱字伯紀方務德館客自言識毛德昭德昭

名文衢州江山縣人居於秀予兒時從之甚久德昭  
極苦學中年不幸病盲而卒無子綱言其盲後猶終  
日危坐默誦六經至數千言不已可哀也赴郡集於  
倅廨中坐花月亭有小碑乃張先子野雲破月來花  
弄影樂章云得句於此亭也晚赴方夷吾導之集於  
陳大光縣丞家二樊吕倅皆在大光字子充瑩中諫  
議孫居第潔雅末利花盛開

七日早遍辭諸人赴方務德素飯晚移舟出城泊禾興

館前館亦頗闊壯終日大雨不止招姜醫視家人及

綯

八日雨霽極涼如深秋遇順風舟人始張帆過合路居  
人繁夥賣鮓者尤衆道旁多軍中牧馬運河水泛溢  
高於近村地至數尺兩岸皆車出積水婦人兒童竭  
作亦或用牛婦人足踏水車手猶績麻不置過平望  
遇大雨暴風舟中盡濕少頃霽止宿八尺聞行舟有  
覆溺者小舟叩舷賣魚頗賤蚊如蝨蠆可畏



九日晴而風舟人憊昨夕狼狽不敢解舟日高方行自  
至崇德行大澤中至此始望見震澤遠山午間至吳  
江縣渡松江風極靜癰庵竹樹益茂而主人死矣知  
縣右承議郎管銑尉右迪功郎周邨來縣治有石刻  
曾文清公漁具圖詩前知縣事柳楹所刻也漁具比  
松陵倡和集所載又增十事云託周尉招醫鄭端誠  
為統絢胗脉皆病暑也市中賣魚鮓頗珍晚解舟中  
流回望長橋層塢煙波渺然真若圖畫宿尹橋登橋

觀月

十日至平江以疾不入泇城過盤門望武丘樓塏正如  
吾鄉寶林為之慨然宿楓橋寺前唐人所謂半夜鐘  
聲到客船者

十一日五更發楓橋曉過許墅居人極多至望亭小憩  
自是夾河皆長岡高壟多陸種菽粟或灌木叢篠氣  
象窘隘非楓橋以東比也近無錫縣始稍平曠夜泊  
縣驛近邑有錫山出錫漢末識記云有錫天下兵無

錫天下清有錫天下爭無錫天下寧至今錫見輒拵  
之莫敢取者

十二日早謁喻子材郎中樗子材來謝以兩夫荷轎不  
持胡床手自授謁云知縣右奉議郎吳澧來晚行夜  
四鼓至常州城外

十三日早入常州泊荆谿館夜月如晝與家人步月驛  
外綯始小愈

十四日早見知州右朝奉大夫李安國通判右朝奉郎

蔣誼員外倅左朝散郎張堅堅文定公綱之子教授  
左文林郎陳伯達員外教授左從政郎沈瀛司戶右  
從政郎許伯虎來伯達字兼善瀛字子壽皆未識子  
壽仍出近文一卷伯虎字子威余兒時筆硯之舊也  
至東嶽廟觀古檜數百年物也又小憩崇勝寺納涼  
遂解舟甲夜過犇牛閘宋明帝遣沈懷明擊孔覲至  
犇牛築壘即此也閘水湍激有聲甚壯遂抵呂城閘  
自祖宗以來天下置堰軍止四處而呂城及京口二

閘在焉

十五日早過呂城閘始見獨轅小車過陵口見大石獸  
偃仆道傍已殘缺蓋南朝陵墓齊明帝時王敬則反  
至陵口慟哭而過是也余頃嘗至宋文帝陵道路猶  
極廣石柱承露盤及麒麟辟邪之類皆在柱上刻太  
祖文皇帝之神道八字又至梁文帝陵文帝武帝父  
也亦有二辟邪尚存其一為藤蔓所纏若繫縛者然  
陵已不可識矣其旁有皇業寺蓋史所謂皇基寺也

疑避唐諱所改二陵皆丹陽距縣三十餘里郡士蔣  
元龍子雲謂予曰毛達可作守時有賣黃金石榴來  
禽者疑其盜捕得之果發梁陵所得夜抵丹陽古所  
謂曲阿或曰雲陽謝康樂詩云朝日發雲陽落日  
到朱方蓋謂此也

十六日早發丹陽汲玉乳井水井在道旁觀音寺名列  
水品色類牛乳甘冷熨齒井額陳文忠公所作堆玉  
八分也寺前又有練光亭下闕練湖亦佳境距官道

甚近然過客罕至是日見夜合花方開故山開過已  
月餘氣候不齊如此過夾岡有二石人植立岡上俗  
謂之石翁石媪其實亦古陵墓前物自京口抵錢塘  
梁陳以前不通漕至隋煬帝始鑿渠八百里皆濶十  
丈夾岡如連山蓋當時所積之土朝廷所以能駐蹕  
錢塘以有此渠耳汴與此渠皆假手隋氏而為吾宋  
之利豈亦有數邪過新豐小憩李太白詩云南國新  
豐酒東山小妓歌又唐人詩云再入新豐市猶聞舊

酒香皆謂此非長安之新豐也然長安之新豐亦有  
名酒見王摩詰詩至今居民市肆頗盛夜抵鎮江城  
外是日立秋

十七日平旦入鎮江泊船西驛見知府右朝散郎直祕  
閣蔡洸子平都統慶遠軍節度使成閔通判右朝奉  
大夫章汶右朝奉郎陶之真府學教授左文林郎熊  
克總領司幹辦公事右承奉郎史彌正端叔

十八日右奉議郎簽書節度判官廳公事葛邰觀察推



官右文林郎徐務滋司戶參軍左迪功郎楊冲焦山  
長老定園甘露長老化昭來

十九日金山長老寶印來字坦叔嘉州人言自峽州以  
西灘不可勝計白傳詩所謂白狗到黃牛灘如竹節  
稠是也赴蔡守飯於丹陽樓熱特甚堆冰滿坐了無  
涼意蔡自點茶頗工而茶殊下同坐熊教授建寧人  
云建茶舊雜以米粉復更以薯蕷兩年來又更以楮  
芽與茶味頗相入且多乳惟過梅則無復氣味矣非

精識者未易察也申後移舟出三閘至潮閘而止

二十日遷入嘉州王知義船微雨極涼

二十一日

二十二日郡集衛公堂後圃比舊唯增染香亭飲半登  
壽丘普照寺終宴壽丘者宋高祖宅有故井尚存寺  
本名延慶隆興中復泗州有普照寺僧奉僧伽像來  
歸寓焉因賜名普照寺僑置僧伽道場東望京山連  
亘抱合勢如繚牆官寺樓觀如畫西闕大江氣象極

雄偉也

二十三日至甘露寺飯僧甘露蓋北固山也有狼石世傳以為漢昭烈吳大帝嘗據此石共謀曹氏石亡已久寺僧輒取一石充數游客摩娑太息僧及童子輩往往竊笑也拜李文饒祠登多景樓樓亦非故址主僧化昭所築下臨大江淮南草木可數登覽之勝實過於舊邂逅左迪功郎新太平州教授徐容容字子公泉州人此山多峭崖如削然皆土也國史以爲石

壁峭絕誤矣

二十四日

二十五日早以一豨壺酒謁英靈助順王祠所謂下元水府也祠屬金山寺寺常以二僧守之無他祝史然勝云賽祭豬頭例歸本廟觀者無不笑初紹興未完顏亮入寇樞密葉公審言督視大軍守江禱於水府祠請事平奏加帝號既而不果隆興中敵再入有近臣申言之議者謂四瀆止封王水府不應在四瀆上

乃但加美稱而已廟中遇武人王秀自言博州人年  
五十一完顏亮寇邊時自河朔從義軍攻下大名以  
待王師既歸朝不見錄且自言孤遠無路自通獻歎  
不已是晚欲出江舟人辭以潮不應遂宿江口

二十六日五鼓發船是日舟人始伐鼓遂游金山登玉  
鑑堂妙高臺皆窮極壯麗非昔比玉鑑蓋取蘇儀甫  
詩云僧於玉鑑光中坐客蹋金黿背上行儀甫果終  
於翰苑當時以為詩識新作寺門亦甚雄瞿耆年伯

壽篆額然門乃不可泊舟凡至寺中者皆由雄跨閣  
長老寶印言舊額仁宗皇帝御飛白張之則風波洶  
湧蛟鼉出沒遂藏之寺閣今不復存矣印住山近十  
年興造皆其力寺有兩壙本曾子宣丞相用西府俸  
所建以薦其先者政和中寺為神霄宮道士乃去壙  
上相輪而屋之謂之鬱羅霄臺至是五十餘年印始  
復為壙且增飾之工尚未畢山絕頂有吞海亭取毛  
吞巨海之意登望尤勝每北使來聘延至此亭烹茶

金山與焦山相望皆名藍每爭雄長焦山舊有吸江亭最為佳處故此名吞海以勝之可笑也夜風水薄船鞳鞳有聲

二十七日留金山極涼冷印老言蜀中梁山軍鷺鷥為天下第一

二十八日夙興觀日出江中天水皆赤真偉觀也因登雄跨閣觀二島左曰鵲山舊傳有栖鵲今無有右曰雲根島皆特起不附山俗謂之郭璞墓奉使金國起

居郎范至能至山遣人相招食於玉鑑堂至能名成大聖政所同官相別八年今借資政殿大學士提舉萬壽宮侍讀為金國祈請使云午間過瓜洲江平如鏡舟中望金山樓觀重複尤為鉅麗中流風雷大作電影騰掣止在江面去舟財丈餘急繫纜俄而開霽遂至瓜洲自到京口無蚊是夜蚊多始復嘔

二十九日泊瓜洲天氣澄爽南望京口月觀甘露寺水府廟皆至近金山尤近可辨人眉目也然江不可橫



絕放舟稍西乃能達故渡者皆遲回久之舟人以帆  
弊往姑蘇買帆是日方至檣高五丈六尺  
帆二十六幅兩日間閱  
往來渡者無慮千人大抵多軍人也夜觀金山塔燈

三十日

渭南文集卷四十三

欽定四庫全書

渭南文集卷四十四

宋 陸游 撰

入蜀記

七月一日黎明離瓜洲便風掛颿晚至真州泊鑒遠  
亭州本唐揚州揚子縣之白沙鎮楊溥有淮南徐  
溫自金陵來覲溥於白沙因改曰迎鑾鎮或謂周  
世宗征淮時諸將嘗於此迎謁非也國朝乾德中

升為建安軍祥符中建玉清昭應宮即軍之西北  
小山置治鑄玉皇聖祖太祖太宗四聖像既成遣  
丁謂李宗鐸為迎奉使副至京車駕出迎肆赦建軍  
曰真州而於故治築儀真觀政和中修九域圖志又  
名曰儀真郡舊以水陸之衝為發運使治所今  
廢

二日見知州右朝奉郎王察市邑官寺比數年前頗盛  
攜統游東園園在東門外里餘自建炎兵火後廢壞

滌地漕司租與民歲入錢數千昔之閔壯巨麗復為  
荊棘荒墟之地者四十餘年乃更葺為園以記考之  
惟清醺堂拂雲亭澄虛閣麤復其舊與右之清池北  
之高臺尚存若所謂流水橫其前者湮塞僅如一帶  
而百畝之園廢為蔬畦者尚過半也可為太息登臺  
望下蜀諸山平遠可愛裴回久之過報恩光孝寺少  
留辛巳之變儀真焚蕩無餘而此寺獨存堂中僧百  
人長老妙湍常州人

三日右迪功郎監稅務聞人堯民來堯民茂德刪定之  
兒子以恩科入官北山永慶長老蘊常來羣集于平  
易堂遍游澄瀾閣快哉亭遂至壯觀以歸壯觀舊有  
米元章所作賦石刻今亡矣初問王守儀真觀去  
城遠近云在城南里許方怪與國史異既歸亟往遊  
則信城南也有老道士出迎年七十餘自言廬州人  
能述儀真本末云舊觀實在城西北數里小土山之  
麓祥符所鑄乃金銅像并座高三丈以黃麾全仗道

門幢節迎赴京師皆與國史合故當時樂章曰范金  
肖像申嚴奉宮館狀翬飛萬靈拱衛瑞煙披堤柳映  
黃麾道士又言賜號瑞應福地則史所不載也今所  
謂儀真觀者昔黃冠入城休憩道院耳晚大風舟人  
增纜

四日風便解纜挂帆發真州岸下舟相見後發者甚衆  
煙帆映山縹緲如畫有頃風愈厲舟行甚疾過瓜步  
山山蜿蜒蟠伏臨江起小峰頗巉峻絕頂有元魏太

武廟廟前大木可三百年一井已智傳以為太武所鑿不可知也太武以宋文帝元嘉二十七年南侵至瓜步建康戒嚴太武鑿瓜步山為蟠道於其上設壇廬大會羣臣疑即此地王文公所謂輦祠瓜步認前朝是也梅聖俞題廟云魏武敗亡歸孤軍駐山頂按太武初未嘗敗聖俞誤以佛狸為曹瞞耳山出瑪瑙石多虎豹害人往時大將劉寶每募人捕虎於此周世宗伐南唐齊王景達自瓜步渡江距六合二十里



設柵亦此地也入夾行數里沿岸園疇衍沃廬舍竹  
樹極盛大抵多長蘆寺莊出夾望長廬樓堦重複  
自江淮兵火官寺民廬莫不殘壞獨此寺之盛不減  
承平至今日常數百衆江面渺瀰無際殊可畏李太  
白詩云維舟至長蘆目送煙雲高是也晚泊竹篠港  
有居民二十餘家距金陵三十里

五日大風將曉覆袂衾晨起淒然如莫秋過龍灣浪湧  
如山望石頭山不甚高而峭立江中繚繞如垣墻凡

舟皆由此下至建康故江左有變必先固守石頭真  
控扼要地也自新河入龍光門城上舊有賞心亭白  
鷺亭在門右近又創二水亭在門左誠為壯觀然賞  
心為二亭所蔽頗失往日登望之勝泊秦淮亭說者  
以為鍾阜艮山得庚水為宗廟水秦鑿淮本欲破金  
陵王氣然庚水反為吉天下事信非人力所能勝也  
見留守右朝請大夫祕閣修撰唐瑑通判右朝散郎  
潘恕建康行宮在天津橋北橋琢青石為之頗精緻

意其南唐之舊也晚小雨右文林郎監大軍倉王烜  
來王言京口人用七月六日為七夕蓋南唐重七夕  
而常以帝子鎮京口六日輒先乞巧翌旦馳入建康  
赴內燕故至今為俗云然攷太宗皇帝時嘗下詔禁  
以六日為七夕則是北俗亦如此此說恐不然

六日見左朝散大夫太府少卿總領兩淮財賦沈夏武  
泰軍節度使建康諸軍都統郭振右宣教郎知江寧  
縣何作善右文林郎觀察推官褚意來作善字百祥

意字誠叔晚見秦伯和侍郎伯和名塤故相益公檜之孫延坐畫堂棟宇闋麗前臨大池池外即御書閣益賜第也家人病創託何令招醫劉仲寶視脉

七日早遊天慶觀在冶城山之麓地理家以為此山脉絡自蔣山來不可知也吳晉間城壘大抵多因山為之觀西有忠烈廟卞壺廟也以嵇紹及壺二子盱眙配食紹死於惠帝時在壺前且非江左事而以配壺非也廟後叢木甚茂傳以為壺墓墓東北又有亭頗

疎豁曰忠孝亭亭本南唐忠貞亭後避諱改爲忠貞  
壺謚今曰忠孝則并以其二子死父難也雲堂道士  
陳德新字可久姑蘇人頗開敏相從登覽久之遂出  
西門游清涼廣慧寺寺距城里餘據石頭城下臨大  
江南直牛頭山氣象甚雄然壞於兵火舊有德慶堂  
在法堂前堂榜乃南唐後主撮襟書石刻尚存而堂  
徙於西偏矣又有蔡悟空禪師文曰保大九年歲次  
辛亥九月皇帝以香茶乳藥之奠致祭於右街清涼

寺悟空禪師按南唐元宗以癸卯歲嗣位改元保大  
當晉出帝之天福八年至辛亥實保大九年當周太  
祖之廣順元年則祭悟空者元宗也建康志以為後  
主非是長老寶餘楚州人留食贈德慶堂榜墨本食  
已同登石頭西望宣化渡及歷陽山真形勝之地若  
異時定都建康則石頭仍為闕要或以為今都城徙  
而南石頭雖守無益蓋未之思也惟城既南徙秦淮  
乃橫貫城中六朝立柵斷航之類緩急不可復施然

大江天險都城臨之金湯之勢比六朝為勝豈必依  
淮為固邪左廸功郎新湖州武康尉劉煒右廸功郎  
比較務李膺來煒秦伯和館客也言秦氏衰落可念  
至屢典質生產亦薄問其歲入幾何曰米十萬斛耳  
八日晨至鍾山道林真覺大師塏焚香塏在太平興國  
寺上寶公所葬也塏中金銅寶公像有銘在其膺蓋  
王文公守金陵時所作僧言古像取入東都啓聖院  
祖宗時每有祈禱啓聖及此塏皆設道場考之信然

塢西南有小軒曰木末其下皆大松髯甲夭矯如蛟  
龍往往數百年物木末蓋後人取王文公詩木末北  
山雲冉冉之句名之建康志謂公自命此名非塢後  
又有定林菴舊聞先君言李伯時畫文公像於菴之  
昭文齋壁著帽束帶神彩如生文公沒齋常扃閉遇  
重客至寺僧開戶客忽見像皆驚覺覺生氣逼人寫  
照之妙如此今菴經火尺椽無復存者予乙酉秋嘗  
雨中獨來遊留字壁間後人移刻崖石讀之感歎蓋



已五六年矣歸途過半山少留半山者王文公舊宅  
所謂報寧禪院也自城中上鍾山此為中途故曰半  
山殘毀尤甚寺西有土山今謂之培塿亦後人取文  
公詩所謂溝西顧丁壯擔土為培塿名之也寺後又  
有謝安墩文公詩云在冶城西北即此是也

九日至保寧戒壇二寺保寧有鳳皇臺攬輝亭臺有李  
太白詩云三山半落青天外二水中分白鷺洲今已  
廢為大軍甲仗庫惟亭因舊趾重築亦頗宏壯寺僧

言亭榜本朱希真隸書已為俗子易之法堂後有片石瑩潤如墨玉乃宋子嵩詩題云鳳凰山亭子陳獻司空鄉貢進士宋齊丘司空者徐知誥也後改姓名曰李昇是為南唐烈祖而齊丘為大臣後又有題字云昇元三年奉勅刻石蓋烈祖既有國追念君臣相遇之始而表顯之昇齊丘雖皆不足道然當攘奪分裂橫潰之時其君臣相遇不如是亦不能粗成其功業也戒壇額曰崇勝戒壇寺古謂之瓦棺寺有閣因

岡阜其高十丈李太白所謂鍾山對北戶淮水入南  
榮者又橫江詞一風三日吹倒山白浪高于庀棺閣  
南唐後主時朝廷遣武人魏丕來使南唐意其不能  
文即宴於是閣因求賦詩丕攬筆成篇末句云莫教  
雷雨損基扃後主君臣皆失色及南唐之亡為吳越  
兵所焚國朝承平二百年金陵為太府寺觀競以崇  
飾土木為事然閣終不能復紹興中有北僧來居講  
惟識百法論誓復興造求偉材於江湖間事垂集者

屢矣會建宮闕有司往往輒取之僧不以此動心愈  
益經營卒成廬舍那閣平地高七丈雄麗冠於江東  
舊閣基相距無百步今廢為軍營秦伯和遣醫柴安  
恭來視家人瘡柴邢州龍岡人晚褚誠叔來誠叔嘗  
為福州閩清尉獲盜應格當得京官不忍以人死為  
己利辭不就至今在選調又有為他邑尉者亦獲盜  
營賞甚力卒得京官將解去入郡過刑人處輒掩目  
大呼數日神志方定後至他郡見通衢有石幢問此

何為從者曰法場也亦大駭叫呼幾墜車自此所至  
皆迂道以避刑人之地人之不可有媿於心如此移  
舟泊賞心亭下秦伯和送藥

十日早出建康城至石頭得便風張帆而行然港淺而  
狹行亦甚緩宿大城岡金陵岡隴重複如梅嶺石子  
岡余讀如蛇婆岡尤其著者也居民數十家亦有店肆

十一日早出夾行大江過三山磯烈洲慈姥磯采石鎮  
泊太平州江口謝玄暉登三山還望京邑李太白登

三山望金陵皆有詩凡山臨江皆曰磯水湍急篙工  
併力撐之乃能上然今年閏餘秋早水落已數尺矣  
則盛夏可知也三山自石頭及鳳皇臺望之杳杳有  
無中耳及過其下則距金陵財五十餘里晉伐吳王  
濬舟師過三山王渾要濬議事濬舉帆曰風利不得  
泊即此地也是日便風擊鼓掛帆而行有兩大舟東  
下者阻風泊浦溆見之大怒頓足詬罵不已舟人不  
會但撫掌大笑鳴鼓愈厲作得意之狀江行淹速常

也得風者矜而阻風者怒可謂兩失之矣世事益多  
類此者記之以寓一笑烈洲在江中上有小山曰烈  
山草木極茂密有神祠在山巔慈姥磯磯之尤巉絕  
峭立者徐師川有慈姥磯詩序云磯與望夫石相望  
正可為的對而詩人未嘗挂齒牙故其詩云離鸞只  
說閨中恨舐犢誰知目下情然梅聖俞護母喪歸宛  
發長蘆江口詩云南國山川都不改傷心慈姥舊時  
磯師川偶忘之耳聖俞又有過慈姥磯下及慈姥山

石崖上竹鞭詩皆極高奇與此山稱采石一名牛渚  
與和州對岸江面比瓜洲為狹故隋韓擒虎平陳及  
本朝曹彬下南唐皆自此渡然微風輒浪作不可行  
劉賓客云蘆葦晚風起秋江鱗甲生王文公云一風  
微吹萬州阻皆謂此磯也磯即南唐樊若水獻策作  
浮梁渡王師處初若水不得志於李氏詐祝髮為僧  
廬於采石山鑿石為竅及建石浮圖又月夜繫繩於  
浮圖棹小舟急渡引繩至江北以渡江面既習知不



謬即亡走京師上書其後王師南渡浮梁果不差尺  
寸予按隋煬帝征遼蓋嘗用此策渡遼水造三浮橋  
於西岸既成引趨東岸橋短丈餘不合隋兵赴水接  
戰高麗乘岸上擊之麥鐵杖戰死始歛兵引橋復就  
西岸而更命何稠接橋二日而成遂乘以濟然隋終  
不能平高麗國朝遂下南唐者實天意也若水何力  
之有方若水之北走也江南皆知獻南征之策或請  
誅其母妻李煜不敢但羈置池州而已其後若水自

陳母妻在江南朝廷命煜護送煜雖憤切終不敢違  
厚遺而遣之然若水所鑿石竅及石浮圖皆不毀王  
師卒用以繫浮梁則李氏君臣之暗且急亦可知矣  
雖微若水有不亡者乎張文潛作平江南議謂當縛  
若水送李煜使甘心焉不然正其叛主之辜而誅之  
以示天下豈不偉哉文潛此說實天下正論也予自  
金陵得疾是日方小愈尚未能食夜雨

十二日早移舟泛姑熟溪五里泊閱武亭初詢舟人云

江口泊船處距城二十里須步乃可入及至閱武乃止在城闔之外徽猷閣直學士左朝請郎知州周元特操聞予病與醫郭師顯俱來視疾自都下相別迨今八年矣太平州本金陵之當塗縣周世宗時南唐元宗失淮南僑置和州於此謂之新和州改為雄遠軍國朝開寶八年下江南改為平南軍然獨領當塗一邑而已太平興國二年遂以為州且割蕪湖繁昌來屬而治當塗與興國軍同時建置故分紀年以名

之

十三日通判右朝請郎葉禁員外通判左朝奉郎錢同  
仲耕軍事判官左文林郎趙子覲知當塗縣右通直  
郎王權來午後入州見元特呼郭醫就坐間為予切  
脉且議所用藥州正據姑熟溪北土人但謂之姑溪  
水色正綠而澄澈如鏡纖鱗往來可數溪南皆漁家  
景物幽奇兩浮橋悉在城外其一通宣城其一可至  
浙中姑熟堂最號得溪山之勝適有客寓家其間故

不得至又有一酒樓登望尤佳皆城之南也往時溪流分一支貫城中湮塞已久近歲浚治然春夏之交暫通今七月已絕流矣李太白集有姑熟十詠予族伯父彥遠嘗言東坡自黃州過當塗讀之撫手大笑曰贗物敗矣豈有李太白作此語者郭功父爭以為不然東坡又笑曰但恐是太白後身所作耳功父甚愠蓋功父少時詩句俊逸前輩或許之以為太白後身功父亦遂以自負故東坡因是戲之或曰十詠及

歸來乎笑矣乎僧伽歌懷素草書歌太白舊集本無之宋次道再編時貪多務得之過也

十四日晚晴開南窗觀溪山溪中絕多魚時裂水面躍出斜日映之有如銀刀垂釣挽罟者彌望以故價甚賤僮使輩日皆饜飫土人云此溪水肥宜魚及飲之水味果甘豈信以肥故多魚耶溪東南數峰如黛蓋青山也

十五日早州學教授左文林郎吳博古敏叔員外教授


左文林郎楊恂信伯來飯已遊黃山東嶽廟廣福寺  
遂登凌歊臺嶽廟棟宇頗盛本謂之黃山大監廟大  
監者不知何神蓋淫祠也今既為嶽廟而大監反寓  
食廡下廣福本壽聖寺以紹興壬午詔書改額敗屋  
二十餘間殘僧三四人蕭然如古驛主僧惠明溫州  
平陽人凌歊臺正如鳳皇雨花之類特因山巔名之  
宋高祖所營面勢虛曠高出氛埃之表南望青山龍  
山九井諸峰如在几席龍山即孟嘉登高落帽處九

井山有桓玄僭位壇稍西江中二小山相對云東梁  
西梁也北戶臨和州新城樓櫓歷歷可辨蓋自絕江  
至和州財十餘里李太白有黃山凌歊臺送族弟泛  
舟赴華陰詩即此地也臺後有一塢塢之後又有亭  
曰懷古云余初至當塗飲姑熟溪水喜其甘滑已而  
遍飲城中水皆甘蓋泉脉佳也

十六日羣集於道院歷遊城上亭榭有坐觀亭頗宜登  
覽城濠皆植荷花是夜月白如畫影入溪中搖蕩如



玉璫始知東坡玉璫卧微瀾之句為妙也



渭南文集卷四十四

# 欽定四庫全書

集部

渭南文集卷四十五至

詳校官庶吉士臣陳若霖

主事臣呂雲棟覆勘

總校官知縣臣繆琪

校對官典簿臣郭祚熾

膳錄監生臣潘炯

欽定四庫全書

渭南文集卷四十五

宋 陸游 撰

入蜀記

十七日羣集於青山李太白祠堂二教授同集祠在青  
山之西北距山尚十五里墓在祠後有小岡阜起伏  
蓋亦青山之別支也祠莫知其始有唐劉全白所作  
墓碣及近歲張真甫舍人所作重修祠碑太白烏巾

白衣錦袍又有道帽氅裘侑食於側者郭功甫也蚤  
飯罷游青山山南小市有謝玄暉故宅基今為湯氏  
所居南望平楚極目而環宅皆流泉奇石青林文篠  
真佳處也遂由宅後登山路極險巖凡三四里有兩  
道人持湯飲迎勞於松石間又里許至一菴老道人  
出迎年七十餘姓周灘州人居此山三十年顴頰如  
丹鬚鬢無白者又有李媪八十矣耳目聰明談笑不  
衰自言嘗得異人秘訣菴前有小池曰謝公池水味

甘冷雖盛夏不竭絕頂又有小亭亦名謝公亭下視  
四山如蛟龍奔放爭赴川谷絕類吾鄉舜山但舜山  
之巔豐沃夷曠無異平陸此所不及也亭北望正對  
歷陽周生言完顏亮入寇時戰鼓之聲震於山中云  
夜歸舟次已一鼓盡矣坐間信伯言桓溫墓亦在近  
郊有石獸石馬製作精妙又有碑悉刻當時車馬衣  
冠之類極可觀恨不一到也

十八日小雨解舟出姑熟溪行江中江溪相接水清濁

各不相亂挽行夾中三十里至大信口泊舟蓋自此  
出大江須風便乃可行往往連日阻風兩小山夾江  
即東梁西梁一名天門山李太白詩云兩岸青山相  
對出孤帆一片日邊來王文公詩云崔嵬天門山江  
水遠其下梅聖俞云東梁如仰鰲西梁如浮魚徐師  
川云南人北人朝莫船東梁西梁今古山皆得句於  
此也水滸小兒賣菱芡蓮藕者甚衆夜行堤上觀月  
大信口歐陽文忠公于役志謂之帶星口未詳孰是

于役志蓋謫夷陵時所著也

十九日便風過大小褐山磯奇石巉絕漁人依石挽罾  
宛如畫圖間所見過梟磯在大江中聳拔特起有道  
士結廬其上政和中賜名寧淵觀舊說梟磯有梟能  
害人故得名方郡縣奏乞觀額時惡其名因曰磯在  
水中水常沃石故曰澆磯今觀屋亦二十餘間然止  
一道人居之相傳有二人則其一輒死故無敢往者  
至蕪湖縣泊舟吳波亭知縣右通直郎呂昭問來按



漢丹陽郡有蕪湖縣吳陸遜屯蕪湖又杜預注春秋  
楚子伐吳克鳩茲亦云在蕪湖至東晉乃改名于湖  
不知所自王敦反屯于湖今故城尚存又有玩鞭亭  
亦當時遺迹唐溫飛卿有湖陰曲叙其事近時張文  
潛以為晉書所云帝至於湖陰察營壘當以于湖為  
句飛卿蓋誤讀也作于湖曲以反之劉夢得歷陽書  
事詩叙道中事云望夫人化石夢帝日環營蓋夢得  
自夔州移牧歷陽過此邑也邑人云數年前邑境有

盜發大墓棺槨已壞得鏡及刀劍之屬甚衆甃磚有大將軍墓四字或疑為敦墓云

二十日寧國太平縣主簿左迪功郎陳炳來見泛小舟往謝之則寓寧淵觀下院以提刑司檄來督大禮錢帛寧淵在梟磯隔大江故置下院於近邑道流十餘壇宇像設甚盛有觀主何守誠者今選居太一宮矣炳字德先婺州義烏人自言其從姑得道徽宗朝賜號妙靜練師結廬葛仙峯下平生不火食惟飲酒啗

生果為人言禍福死生無毫釐差每風日清和時輒掩闥獨處或於戶外竊聽之但聞若二嬰兒聲或歌或笑往往至中夜方止莫有能測者年九十正旦自四月八日當遠行果以是日坐逝每為德先言汝有仙骨當遇異人後因得疾委頓有皖山徐先生來餌以藥即日疾平徐因留教以絕粒訣德先父母方望其成名固不許然自是絕滋味日食淡湯餅及飯而已如此者六年益覺身輕能日行二百里會中第娶

妻復近輦血徐遂告別臨行語德先曰汝二紀後當  
復從我究此事德先送至谿上方呼舟欲渡徐褰裳  
疾行水上而去呼之不復應德先至今悵悵有棄官  
入瀟皖之意予遂游東寺登王敦城以歸城並大江  
氣象宏敞邑出綠毛龜就船賣者不可勝數將午解  
舟過三山磯磯上新作龍祠有道人半醉立蘚崖峭  
絕處下觀行舟望之使人寒心亦奇士也江中江豚  
十數出沒色或黑或黃俄又有物長數尺色正赤類

大蜈蚣奮首逆水而上激水高三二尺殊可畏也宿  
過道口

二十一日過繁昌縣南唐所置初隸宣城及置太平州  
復割隸焉晚泊荻港散步堤上游龍廟有老道人守  
之台州居縣人自言居此十年日伐薪二束賣之以  
以自給雨雪則從人乞未嘗他營也又至一菴僧言  
隔港即銅陵界遠山嶄然臨大江者即銅官山太白  
所謂我愛銅官樂千年未擬還是也恨不一到最後

至鳳凰山延禧觀觀廢於兵燼者四十餘年近方興葺羽流五六人觀主陳延瑞婺州義烏縣人言此古青華觀也有趙先生荻港市中人父賣茗先生幼名王九年十三疾亟父抱詣青華願使入道是夕先生夢老人引之登高山謂曰我陰翁也出柏枝啗之及覺遂不火食後又夢前老人教以天篆數百字比覺悉記不遺太宗皇帝召見度為道士賜冠簡易名自然給裝錢遣還遂為觀主祥符間再召至京師賜紫

衣改青華額曰延禧先生懇求還山養母得歸一日  
無疾而逝門人葬之山中行半途棺忽大重不可舉  
其母曰吾兒必有異命發棺果空無尸惟劒履在耳  
遂即其處葬之今冢猶在謂之劒冢自然國史有傳  
大槩與廷瑞言頗合惟劒冢一事無之荻巷蓋繁昌  
小墟市也歸舟已夜矣

二十二日過大江入丁家洲夾復行大江自離當塗風  
日清美波平如席白雲青嶂遠相暎帶終日如行圖

畫殊忘道途之勞也過銅陵縣不入晚泊水洪口江湖間謂分流處為洪王文公詩云東江木落水分洪是也

二十三日過陽山磯始見九華山九華本名九子李太白為易名太白與劉夢得皆有詩而劉至以為可兼太華女几之奇秀南唐宋子嵩辭政柄歸隱此山號九華先生封青陽公由是九華之名益盛惟王文公詩云盤根雖巨壯其末乃修纖最極形容之妙大抵



此山之奇在修纖耳然無含蓄敦大氣象與廬阜天台異矣岸傍荻花如雪舊見天井長老彥威云廬山老僧用此絮紙衣威少時在惠日亦為之佛燈珎禪師見而大嘆云汝少年輒求溫暖如此豈有心學道邪退而問兄弟則堂中百人有荻花衣者財三四皆年七十餘矣威愧恐亟除去泊海根港巨魚十數色蒼白大如黃犢出沒水中每出水輒激起沸白成浪真壯觀也

二十四日到池州泊稅務亭子州唐置南唐嘗為康化  
軍節度今省又嘗割青陽隸建康今復故惟所置銅  
陵東流二縣及改秋浦為資池今因之蓋南唐都金  
陵故當塗蕪湖銅陵繁昌廣德青陽并江寧上元溧  
陽溧水句容凡十一縣皆隸畿內今建康為行都而  
纔有江寧等五邑有司所當議也李太白往來江東  
此州所賦尤多如秋浦歌十七首及九華山清溪白  
筇陂玉鏡潭諸詩是也秋浦歌云秋浦長似秋蕭條

使人愁又曰兩鬢入秋浦一朝颺已衰援聲催白髮  
長短盡成絲則池州之風物可見矣然觀太白此歌  
高妙乃爾則知姑熟十詠決為贋作也杜牧之池州  
諸詩正爾觀之亦清婉可愛若與太白詩並讀醇醅  
異味矣初王師平南唐命曹彬分兵自荊州順流東  
下以樊若水為鄉導首克池州然後能取蕪湖當塗  
駐軍采石而浮橋成則池州今實要地不可不備也  
二十五日見知州右朝議大夫直秘閣楊師中通判右

朝奉郎孫德劄游光孝寺寺有西峯聖者所留鐵笛  
聖者生當吳武王楊行密時陽狂不羈好吹笛能役  
鬼神蛟龍嘗寓池州乾明寺乾明即光孝也及去留  
笛付主事僧笛似銅鐵而非色綠而瑩潤如綠玉不  
知何物僧懼為好事者所奪郡官求觀之輒出一凡  
鐵笛充數予偶與監寺僧有舊獨得一見有石刻沈  
睿達所作西峯銘文辭古雅可愛恨非其自書也僧  
言貴池去城八十里在秀山下江之一支別匯為池四

隅皆因山石為岸產鯉魚金鱗朱尾味極美本以此  
得貴池之目秀山有梁昭明太子墓拱木森然今池  
州城西有神甚靈者曰九郎或云九郎即昭明晚登  
弄水亭杜牧之所賦詩也亭殊不葺然正對清溪齊  
山景物絕佳州雖瀕江然據岡阜上頗難得水

二十六日解舟過長風沙羅刹石李太白江上贈竇長  
史詩云萬里南遷夜郎國三年歸及長風沙梅聖俞  
送方進士游廬山云長風沙浪屋許大羅刹石齒水

下排歷此二險過湓浦始見瀑布懸蒼崖即此地也  
又太白長干行云蚤晚下三巴預將書報家相迎不  
道遠直到長風沙蓋自金陵至此七百里而室家來  
迎其夫甚言其遠也地屬舒州舊最號湍險仁廟時  
發運使周湛役三十萬夫疏支流十里以避之至今  
為行舟之利羅剎石在大江中正如京口鵲峯而稍  
大白石拱起其上叢篠喬木亦有小神祠檣竿不知  
何神也西望羣山靡迤巖嶂深秀宛如吾廬南望鏡

中諸山為之累歎宿懷家狀懷姓也吳有尚書郎懷  
叙見顧雍傳

二十七日五鼓大風自東北來舟人不告蔡便風解船  
過雁翅夾有稅場居民二百許家岸下泊船甚衆遂  
經皖口至趙屯未朝食已行百五十里而風益大乃  
泊夾中皖口即王師破江南大將朱令贇水軍處趙  
屯有成兵亦小市聚也是日大風至莫不止登岸行  
至夾口觀江中驚濤駭浪雖錢塘八月之潮不過也

有小舟掀簸浪中欲入夾者再三不可得幾覆溺矣  
號呼求救久方能入北望正見皖山太白江上望皖  
公山詩云巉絕稱人意巉絕二字不刊之妙也南唐  
元宗南遷豫章舟中望皖山愛之謂左右曰此青峭  
數峯何名畬曰舒州皖山時方新失淮南伶人李家  
明侍側獻詩曰龍舟千里颺東風漢武潯陽事正同  
回首皖公山色好日斜不到壽盃中元宗為悲憤歎  
歎故王文公詩云南狩皖山非故地北師淮水失名



王計其處當去此不遠也夜雨

二十八日過東流縣不入自雷江口行大江江南羣山  
蒼翠萬疊如列屏障凡數十里不絕自金陵以西所  
未有也是日便風張颿舟行甚速然江面浩渺白浪  
如山所乘二千斛舟搖兀掀舞纔如一葉過獅子磯  
一名佛指磯巖壁百尺青林綠篠倒生壁間圖畫所  
所不及猶恨舟行北岸不得過其下旁有數磯亦奇  
峭然皆非獅子比也至馬當所謂下元水府山勢尤

秀拔正面山腳直插大江廟依峭崖架空為閣登降  
者皆自閣西崖腹小石徑捫蘿側足而上宛若登梯  
飛甍曲檻丹碧縹緲江上神祠惟此最佳舟至石壁  
下忽晝晦風勢橫甚舟人大恐失色急下颿趨小港  
竭力牽蚤間同行一舟亦蜀舟也忽有大魚正綠腹  
蚤間同行一舟亦蜀舟也忽有大魚正綠腹下赤如  
丹躍起拖旁高三尺許人皆異之是晚果折檣破帆  
幾不能全亦可怪也入夜風愈厲增十餘纜迨曉方

少定

二十九日阻風馬當港中風雨淒冷初御袂衣有小舟  
冒風濤來賣薪菜猪肉亦有賣野彘肉者云獵蘆場  
中所得飯已登南岸望馬當廟北風吹人勁甚至不  
能語既莫風少定然怒濤未息擊船終夜有聲

八月一日過烽火磯南朝自武昌至京口列置烽燧此  
山當是其一也自舟中望山突兀而已及拋江過其  
下嵌巖竇穴怪奇萬狀色澤瑩潤亦與它石迥異又

有一石不附山傑然特起高百餘尺丹藤翠蔓羅絡  
其上如寶裝屏風是日風靜舟行頗遲又秋深潦縮  
故得盡見杜老所謂幸有舟楫遲得盡所歷妙也過  
澎浪磯小孤山二山東西相望小孤屬舒州宿松縣  
有成兵凡江中獨山如金山焦山落星之類皆名天  
下然峭拔秀麗皆不可與小孤比自數十里外望之  
碧峯巉然孤起上於雲霄已非他山可擬愈近愈秀  
冬夏晴雨姿態萬變信造化之尤物也但祠宇極於

荒殘若稍飾以樓觀亭榭與江山相發揮自當高出  
金山之上矣廟在山之西麓額曰惠濟神曰安濟夫  
人紹興初張魏公自湖湘還嘗加營葺有碑載其事  
又有別祠在澎浪磯屬江州彭澤縣三面臨江倒影  
水中亦占一山之勝舟過磯雖無風亦浪湧蓋以此  
得名也昔人詩有舟中估客莫漫狂小姑前年嫁彭  
郎之句傳者因謂小孤廟有彭郎像澎浪廟有小姑  
像實不然也晚泊沙夾距小孤一里微雨復以小艇

游廟中南望彭澤都昌諸山煙雨空濛鷗鷺滅沒極  
登臨之勝徙倚久之而歸方立廟門有俊鵬搏水禽  
掠江東南去甚壯也廟祝云山有棲鵬甚多

二日蚤行未二十里忽風雲騰湧急繫纜俄復開霽遂  
行泛彭蠡口四望無際乃知太白開帆入天鏡之句  
為妙始見廬山及大孤大孤狀類西梁雖不可擬小  
姑之秀麗然小孤之旁頗有沙洲葭葦大孤則四際  
渺瀰皆大江望之如浮水面亦一奇也江自湖口分

一支為南江蓋江西路也江水渾濁每汲用皆以杏  
仁澄之過夕乃可飲南江則極清澈合處如引繩不  
相亂晚低江州州治德化縣即唐之潯陽縣柴桑栗  
里皆其地也南唐為奉化軍節度今為定江軍岸土  
赤而壁立東坡先生所謂舟人指點岸如頰者也泊  
湓浦水亦甚清不與江水亂自七月二十六日至是  
首尾財六日其間一日阻風不行實以四日半泝流  
行七百里云

三日移泊琵琶亭見知州左朝請郎周昇強仲通判左朝散郎胡适發運使戶部侍郎史正志志道發運司幹辦公事程坦履道察推左文林郎蔡戡定夫始得夔州公移

四日游天慶觀李太白詩所謂潯陽紫極宮也蘇黃詩刻皆不復存太白詩有一石亦近時俗書見觀主李守智問玉芝亦不能畚觀皆古屋初不更兵燹而遺迹掃地獨太清殿老君像乃唐人所塑特為奇古真



人女真仙官力士童子各二軀又有唐明皇帝金銅像衣冠如道士而氣宇粹穆有五十年安享太平富貴氣象李守智者滁州來安人自言家故富饒遇亂棄家為道人大將岳飛以度牒與之始為道士至今畫岳氏父子事之史志道招飲於發運解中登高望亭望廬山天氣澄霽諸峯盡見志道出新鼓鑄鐵錢五日羣集於庾樓樓正對廬山之雙劍峯北臨大江氣象雄麗自京口以西登覽之地多矣無出庾樓右者

樓不甚高而覺江山煙雲皆在几席間真絕景也庾亮嘗為江荊豫州刺史其實則治武昌若武昌南樓名庾樓猶有理今江州治所在晉特柴桑縣之湓口關耳此樓附會甚明然白樂天詩固已云潯陽欲到思無窮庾亮樓南湓口東則承誤亦久矣張芸叟南遷錄云庾亮鎮潯陽經始此樓其誤尤甚

六日甲夜有大燈毬數百自湓浦蔽江而下至江面廣處分散漸遠赫然如繁星麗天土人云此乃一家放

五百椀以禳災祈福蓋江鄉舊俗云

七日往廬山小憩新橋市蓋吳蜀大路市肆壁間多蜀人題名並溪喬木往往皆三二百年物蓋山之麓也自江州至太平興國宮三十里此適當其半是日車馬及徒行者憧憧不絕云上觀蓋往太平宮焚香自八月一日至七日乃已謂之白蓮會蓮社本遠法師遺迹舊傳遠公嘗以一日借道流故至今太平宮歲以為常東林寺亦自作會然來者反不若太平之盛

亦可笑也晚至清虛菴菴在撥雲峯下皇甫道人所  
居皇甫名坦嘉州人出游旁郡獨見其弟子曾彌深  
登紹興煥文閣寶藏光堯皇帝御書又有神泉清虛  
堂皆宸翰題榜宿清虛西室曹君置酒堂中炙鹿肉  
甚珍酒尤清醇夜寒可附火

渭南文集卷四十五